

ՄՏԵՓԱՆՈՍ ՍԱԼՄԱՍՏԵՑՈՒ ԱՌԱՔԵԼՈՒԹԵԱՆ ԲՆՈՅԹԸ

Յայտնի է, որ Ստեփանոս Սալմաստեցին Արեւելեան Հայաստանի մելիքների յանձնարարական նամակներով, որոնք ուղղուած էին Հռոմի պապին եւ Արեւմուտքի մի քանի քրիստոնեայ պետութիւններին, անցնում է Եւրոպա՝ Հայաստանի ազատագրման համար օժանդակութիւն ապահովելու յոյսով: Այդ կարծիքին է նաեւ Պետրովիչը¹: Մեր տարակարծութիւնը նրա հետ՝ ըստ երեւոյթին կայանում է իր նպատակների իրագործման համար Սալմաստեցու ձեռք առած միջոցների գնահատման մէջ:

Սալմաստեցին դիւանագիտական բանակցութիւնների մէջ էր մտնում Հռոմի եւ եւրոպական կաթոլիկ իշխանութիւնների հետ եւ հասկանալի է, որ, եթէ նրանցից օգնութիւն էր խնդրում, ինքն էլ պիտի արամադրութիւն ցոյց տար ինչ որ բանով ու չափով փոխադարձութիւն անելու կամ խօստանալու, եւ դա՛ մի եկեղեցու գերագոյն պետի համար չէր կարող լինել այլ բան, քան զիջումներ անել կամ խօստանալ՝ կրօնական հարցերի բնագաւառում:

Եւ, ահա, մենք տեսնում ենք, որ դիւանագիտական այդպիսի հաշիւներով է, որ Սալմաստեցին 1548/1549 թուականներին յանկարծ յայտնուում է Հռոմում՝ ցնցող ապաւորութիւն գործելով այդ միջավայրում:

Յայտնի մտաւորական Պ. Պ. Գ. Արեւիհոսը գրում է, որ հայոց կաթողիկոս Ստեփանոսը «Հռոմ եկաւ 1548 թուականին եւ հպատակութիւն յայտնեց Պօղոս Գ պապին ու իր դաւանութիւնը առեց համաձայն այն դաւանանքի, որը սահմանուած էր Փլորենտեան ժողովում՝ Եւզիւիոս Դ-ի ժամանակ»²: Իսկ վատիկանեան դիւանի մի վաւերագրի համաձայն՝ 1549 թ. օգոստոսի 21-ին տեղի ունեցած կարգինալական նիստում (Consistorium) խօսուում է այն մասին, թէ վերջերս Հռոմ էր ժամանել մի հայ պարիարք՝ արամադրութիւն ցոյց տալով «հնադանդութիւն յայտնել Նորին Սրբութեանը եւ Հռոմէական Ս. Եկեղեցուն, խնդրելով, որ ժողովրդի կողմից իր անձի սրպէս հայոց պարիարք կատարուած ընտրութիւնը հաստատուի Նորին Սրբութեան կողմից» եւ թէ երեք կարգինալների յանձնարարուում է սուսումնասիրել այս հարցը՝ «խորհելու համար, թէ ի՞նչ կայ անելու եւ Նորին Սրբութեանը տեղեկացնելու»³:

Միամտութիւն կը լինէր, սակայն, կարծել, թէ հայոց ազգային եկեղեցու դիտապետ Ստեփանոս Սալմաստեցին մինչեւ հեռաւոր Հռոմ հասնելու յոգնութիւնը յանձն էր առել պարզապէս նրա համար, որ կամաւորապէս Լատինական Եկեղեցուն նուիրաբերէր իր դարաւոր անկախ եկեղեցին, եւ ընդունէր նրա դահակալի հպատակութիւնը: Եթէ նա խօսում էր այդպիսի՝ տարապայմանօրէն խոշոր զօհողութեան մասին, այն էլ մի ամբողջ ժողովրդի անունից, դա չէր լինի առանց ակնկալութիւնների եւ առանց երկկողմանի ու հաւասար պայմանների: Եթէ մենք ընդունում ենք, որ Սալմաստեցու այս ուղեւորութեան շարժառիթը հայկական հարցն էր, ինչպէս ընդունում է եւ Պետրովիչը, եւ նա պաշտօն ունէր այդ մասին բանակցութիւններ կատարելու Հռոմում, ապա միաժամանակ պիտի ընդունենք, որ նմանօրինակ բանակցութիւնները միակողմանի պայմաններով չէ, որ կարող էին կատարուել: Քաղա-

¹ ՊՍՍ էջ 11 եւ շար.:

² Steph.-Evod. Assemanus, «Bibliothecae Mediceae Laurentianae et Palatinae codicum mms. orientialium catalogus», Florentiae, 1742, p. 60.

³ Archivum Secretum Vaticanum, Ae a Consistorialia incipientia ab anno 1537, tempore Pontificatus s. m. Pauli Papae III, per totum annum 1550, sub Iulio Papa III, p. 1035, 1042-1043. տես Օ. Raynaldus, «Annales ecclesiastici», Lucae, 1755, ad annum 1549, № 35. Հմմտ. ՊՍՍ էջ 17. PChA p. 91.